

■ TRIBUNA POLITICA

Na ad ina taglia federala sin l'ierta

DA BARBARA JANOM STEINER,
CUSSEGLIERA GUVERNATIVA

Tenor l'iniziativa federala per ina taglia sin l'ierta, davart la quala il suveran vegn a votar ils 14 da zercladur, duai la confederaziun incassar ina taglia sin l'ierta e sin donaziuns. Dus terzs dal regav duain ir a favur da la AVS ed in terz a favur dal chantun da domicil da la testadra u dal testader ubain da la donatura u dal donatur. La taglia importass 20 pertschient da l'entira facultad d'ierta, sche quella surpassass dus milliuns francs. Liberads da la taglia fissan mo il conjugal survivent e las personas giuridicas ch'èn libras da taglia.

L'iniziativa è d'ina vart lina intervenziun fundamentala en la suveranità fiscal dals chantuns. Da l'autra vart n'è ella betg adattada per schliar ils problems structurals da la AVS. Las entradas prognostitgadas na bastan insumma betg per far quai. Ella pegiurass però marcantamain la situaziun dal Grischun sco lieu fiscal, perquai ch'ella periclitass bler substrat da taglia. Nus ristgain che las personas fitg ritgas ch'èn obligadas da pajar taglia van davent a star cun la consequenza che las prestaziuns fiscalas correspundentas ston vegnir repartidas sin las ulteriuras personas ch'èn obligadas da pajar taglia.

L'iniziativa ha er numeras mancanzas gravantas ch'il legislatur na po betg pli curreger. En emprima lingia violescha



ella il princip da la giustizia. Nagin na po pretend ch'in import liber da taglia da dus milliuns francs u ina tariffa da taglia da 20 pertschient sajan gists independentamain dal grad da parentella da las beneficiarias u dals beneficiaris.

Ultra da quai po mo il relasch d'ina persona cun domicil en Svizra vegnir suttamess a la taglia. Sch'ina persona che viva a l'exteriur posseda ina villa en il Grischun cun ina valur per exempel da 20 milliuns francs e sch'ils uffants ertan questa villa na po vegnir incassada nagina taglia sin l'ierta. Per personas cun domicil en Svizra resultass ina taglia d'almain 3,6 milliuns francs.

La taglia sin l'ierta vegniss concepida sco taglia sin il relasch, uschia che l'import liber da taglia da dus milliuns francs na pertutgass betg la facultad che vegn surdada a la singula ertavla u al singul ertavel, mabain l'entir relasch. En cas d'ina facultad relaschada per exempel da tschintg milliuns francs po in uffant

singul survegnir in import liber da taglia da dus milliuns francs, in uffant cun trais fragliuns però mo pli mintgamai 500 000 francs. Ma er l'onda che relascha sia facultad a ses unic nev po al surdar in import liber da taglia da dus milliuns francs. En cumparegliaziun cun ina famiglia cun blers uffants para quai dad esser nunchapibel.

Ultra da quai resulta da l'iniziativa ina chargia supplementara massiva da transferiments da facultad sin uffants e biadis ed ina ferma distgargia da transferiments da facultad sin personas betg parentas. En quest champ vegn la chargia maximala actuala da fin a 35 pertschient per il chantun e la vischnanca a sa reducir sin 20 pertschient.

La finala periclitatescha l'iniziativa er la plansaziun da la successiun en manaschis agriculs ed en IPM. Ella prevesa bain ina reducziun da l'imposiziun da taglia, da la quala la concretisaziun vegn surlaschada al legislatur. Questa reducziun è però colliada cun la cundiziun ch'il manaschi vegn cuntinuà durant almain 10 onns. Quai chaschuna ina malsegirezza giuridica e blera lavur administrativa.

L'iniziativa per ina taglia sin l'ierta n'è ni en l'interess dal chantun ni en l'interess da las Grischunas e dals Grischuns – schai perquai «NA».